

# Төртүйдө өзгеріс көп



Сылақшы Сергей Антоненко

Биылғы жыл берекелі болып тұр. Қала бюджетіне қаржы көптеп құйылып, бұл молшылықтың шапағатын ауылдық округтер де көре бастады. Мұны біз Төртүй ауылына барып қайтқанда анық байқадық. Кеңес дәуірінде кеңшар асханасы болған, бертін ауыл клубына айналған үйде күрделі жөндеу жұмыстары аяқталуға таяп қалыпты. Бұл үшін қала қазынасынан 4,5 миллион теңге бөлініп, құрылыс жұмысын кәсіпкер Рашид Сағымбаевтың «Атамекен ЛТД» ЖШС-і жүргізіп жатыр. Ауыл клубына жаңа өң беру жұмысына серіктестік бастығы қолынан іс келетін жергілікті жігіттерді жалдапты. Бригадирі-мамандығы прораб Бейсен Сембин. Оның қарамағындағы Жәкібек Байниязов, Сайдалы Лоқашев, Қуандық Ризолла, Сергей Антоненко жүктелген міндеттерін білек сыбанып атқарып жүр. Енді клубта

жасалған өзгеріске келсек, шатыры ақ қаңылтырмен жабылып, бұрын пайдаланылмай тұрған екі бөлмеде жөндеу жүргізілген. Сөйтіп, ауыл клубы меңгерушісі отыратын қызмет кабинеті мен өнерпаздар дайындалатын кең бөлме жарқырап шыға келген. Айтпақшы, клуб қайта ашылғанда көрермен залына қаладағы «Өнер» мәдениет орталығынан берілген жұмсақ орындықтар қойылатын көрінеді. Тағы бір айта кететін жай, дәл осындай күрделі жөндеу жұмысы Екібастұз ауылдық округіне қаратылған Тай ауылының клубында да жасалып жатыр. Ауылдық мәдениет ошақтарына осылайша мән беру, өрине, құптарлық іс.

Қала билігі ауыл балаларының бос уақытын бос өткізбеуін де ойластырды. Төртүй мен Тай ауылдарында ойын алаңшалары пайдалануға берілген. Оны Павлодар қаласындағы «Төрем» ЖШС-і іске қосыпты.

Ауыл халқының басты кәсібі мал өсіру екені белгілі. Ол үшін де жағдай жасалуы тиіс. Осы орайда төртүйліктер мал суаратын ортақ құдықтың болмауынан қиыншылық көріп келсе, енді оның бәрі артта қалған тәрізді. Бюджеттен осы мақсатқа бөлінген 2,3 миллион теңге қаржыны игерген «Павлодар гидрогеология» ЖШС-і ауыл шетінен артезиан ұңғымасын қазыпты. Елу метр тереңдіктен шыққан судың сапасын қазір СЭС мамандары тексеру үстінде. Екібастұз ауылдық округі әкімі Марат Құспеков: «Біздің ендігі міндет-құдыққа электр қуатын тарту» дейді әңгіме арасында.

Жалпы, Төртүй биыл қыстаққа қапысыз әзірленіпті. Мұнда 16640 тонна пішен дайындалып, оның 90 пайызы ауылға жеткізіліп, үйілген. Күз шаруаға жайлы болып тұр ғой, далада қалған

азын-аулақ шөпті тасып үлгеруге мүмкіндік бар.

Мемлекеттің қолдауына сүйенген төртүйліктер арасында жеке шаруасын дөңгелете түсуді қолға алғандар да баршылық. Мәселен, «Жұмыспен қамту-2020» бағдарламасы аясында Аманжол Төлеубеков пен Толқын Ахметова қаражат алып, мал өсіруге ниеттеніп отыр. Таяу арада олардың қатарына Ерсайын Уахитов та қосылады. Ал Бауыржан Сембин жоғарыда аталған мемлекеттік бағдарлама бойынша алатын қаражатын ауылда шағын кәсіпкерлікті дамытуға жұмсамақшы. Атап айтқанда, көлік жөндеу шеберханасын ашуды жоспарлап отыр. Ауылда техника тілін жетік білетін жігіттер бар екенін ескерсек, Бауыржанның ісі алға басып кетеріне күмән жоқ.

Түйіндеі айтқанда, Төртүйде өзгеріс көп. Десек те, жұртты алаңдатып отырған бір мәселе бар. Ол-мал ұрлығы. Қазан айында он шақты мал жайылымнан қолды болған. Өрине, бағылмайтын малды айдап кету ұрыға да жеңіл. Сондықтан ауыл әкімі тұрғындарға малды бақташыға бақызудың тиімділігін түсіндіруі қажет-ақ. Әйтпесе, бірер жандығынан айырылып қалған соң полицияға арызданғаннан ештеңе де өнбейді.

**Ж.ЖӘЛЕЛҰЛЫ, Төртүй ауылы**



Жаңарған клуб үйі



Артезиан ұңғымасы